



Inatsisartuni ilaasortaq Erik Jensen, Siumut
/Maani

Kangerlussuaq pillugu § 37 naapertorlugu apeqquteqaammut 2021-130-mut akissut

04-10-2021
Suliap normua:2021-17086
ID. nr. 68680775

Asasara Erik Jensen

Inatsisartut suleriaasianni § 37 naapertorlugu Kangerlussuaq pillugu Naalakkersuisunut apeqquteqaateqarputit. Apeqqutitit uannit akineqartussatut innersuunneqarput. Apeqqutitit matuma kinguliani ataasiakkaarlugit allanneqarput, akissummillu malitseqarlutik.

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
www.naalakkersuisut.gl

Apeqqut 1. Nuummi mittarfissap ukiumik ataatsimik kinguaattoornera Kangerlussuarmi mittarfiup iluarsartuunneqarnissaanut qanoq kinguneqassava?

Akissut: Kangerlussuarmi iluarsartuutassat, sanaartornissap pilersaarusiornissaanut tamatumalu kingorna pilersaarusiornermut atatillugu paasiniarneqartussat annertussuui apeqqutaassapput. Iluarsartuussinermi Kangerlussuarmi mittarfik matugallarneqartariaqassappat, Nuup mittarfiani kinguaattoorneq peqqutigalugu mittarfiup iluarsanneqarnissaa Nuummi mittarfiup atorneqalereernissaata tungaanut kinguartinneqarsinnaavoq. Soorunami suliame Kangerlussuup nunaqarfiani pilersuinerup isumannaassusissaata eqqarsaatigineqarnissaa pingaaruteqarpoq.

Apeqqut 2. Kangerlussuarmi mittarfiup iluarsanneqarnissaata kingusinnerusukkat aatsaat allartinneqassappat kinguarsarneqassappalluunniit akisunerulernerneranik kinguneqassava?

Akissut: Naalakkersuisut Mittarfeqarfiit suleqatigalugit tamatuma aningaasatigut kingunerisinnaasaasa paasiniarneqarnissaat suliarissavaat. Tamatuma saniatigut apeqqut attaveqarnermut ataatsimiititaliap Angallannermut Aqutsisoqarfimmut saqqummiutissavaa.

Periarfissaq manna iluatsillugu apeqquteqartup Kangerlussuarmi mittarfiup iluarsanneqarneranut, ukioq manna apriili tikillugu naalakkersuisoqatigiinnit, Siumumit aqunneqartumut atatillugu oqaatsimik "kinguarsarneqassappat"-mik atuinera tapersersinnaanginnakku oqaatigissavara. Suliaq taanna suleqataasunit akuusut tamaasa peqatigalugit sullissutigineqarpoq ilungersuunneqarlunilu.

**Apeqqu 3. Kangerlussuarmi unnuisarfip (hotel)
namminersortunngorsarneqarnissaa Naalakkersuisut qanoq isumaqarfigaat?**

Akissut: Naalakkersuisut Mittarfeqarfiit aktianik piginneqatigiiffinngorlugu allanngortinneqarnissaanut inatsisissatut siunnersuutip UPA2022-mi saqqummiunneqarnissaa naatsorsuutigaat. Suliap taassuma kingunerisaanik Mittarfeqarfiit ataanni sullivanik, mittarfilerinermut tunnganngitsunik Mittarfeqarfiit paaaniartussaapput. Tamatumunnga aamma akunnitarfiit ingerlanneqarnerini ilaatinneqarput.

Apeqqu 4. Unnuisarfip (hotel) namminersortuniit ingerlanneqarnissaa soqutigineqarpat, mittarfeqarfinniit namminersortunut qaqugumiit tunniunneqarsinnaasoq Naalakkersuisut takorloorpaat?

Akissut: Sullianik mittarfinnut attuumassuteqanngitsunik paaanissaq ilaatigut Naalakkersuisut Mittarfeqarfiit aktianik piginneqatigiiffinngorlugu allanngortinneqarnissaanut inatsisissatut siunnersuutip UPA2022-mi saqqummiussinerat tunngavigalugu suliaqarnikkut pissasoq naatsorsuutigineqarpoq.

Apeqqu 5. Sakkutuunngorniarluni ilinniarfissamut Naalagaaffiup aningaasat immikkoortissimasai kr. 50 mio. Naalakkersuisut sooruna qjarutinngikkaat?

Akissut: Nunanut Allanut Silallu Pissusianut Naalakkersuisoqarfik akissuteqartinneqarpoq:

"Danskit naalakkersuisui aamma Venstre, Dansk Folkeparti, Radikale Venstre, Det Konservative Folkeparti aammalu Liberal Alliance Issittumi aamma Imapriup avannaani Illersornissaqarfiup nukittorsaavigineqarnissaanut sinaakkusiussassamik isumaqatigiissuteqarput, tassanilu 2019-imi tapiliussatut isumaqatigiissummiit 1,5 mia. koruuninik atugassiisoqarpoq. Matumani sinaakkusiussassamik isumaqatigiissuteqarneq pineqarpoq, tassanilu Illersornissamut Ministereqarfik isumaqatigiissuteqarfiusut akuutillugit suliniutit akornanni aningaasanik atugassiinnaavoq.

Taamaalilluni aningaasat Naalagaaffiup Naalakkersuisunut aningaasaliissutiginnigilaat.

Issittumi piginnaasani tamarmiusuni suliassat ataatsimoortut pillugit Naalakkersuisut Illersornissamut Ministereqarfimmut isumaqatiginninniarnernik aallartitsipput, isumaqatiginninniarnerrillu taakku ingerlapput."

Apeqqu 6. Sakkutuunngorniarnissamut taarsiullugu upalungaarsimanermut ilinniarfissamut atatillugu, Naalakkersuisuniit Naalagaaffimmut oqaloqatiginninnerit qaqugu aallartissappat?

Akissut: Nunanut Allanut Silallu Pissusianut Naalakkersuisoqarfik akissuteqartinneqarpoq:

"Takuuk apeqqu nr. 5-imut akissut."

Apeqquut 7. Nunatsinni takornariaqarnikkut annertusaanissamut Kangerlussuarmi aammalu Sisimiut Kangerlussuullu akornganni aqqusineqalerneratigut periarfissatut neqeroortugineqarsinnaasut Naalakkersuisut pitsaasutut aningaasarsiornikkullu tapertaalluarsinnaasutut isumaqarfigivaat?

Akissut: Naalakkersuisut nalunaarusiaq *"Sisimiut – Kangerlussuup akornanni aqquserniassami annaasaqaataasinnaasunik naliliineq"*, siunnersorteqarfimmit Oxford Global Projects-imit 3. september 2021-imi suliarineqartoq suliaraat tamanullu ammasumik saqqummiullugu. Nalunaarusiaq Qeqqata Kommuniata aamma Naalakkersuisut aqquserniassamik misissuisoqarnissaa pillugu suleqatigiinnerisa inerneraa.

Apeqquutip aningaasaliissutit aningaasaqarnikkut iluaqutaasumik sunniuteqarsinnaaneri pillugit oqaasertalernerqarneranut tunngatillugu Naalakkersuisunit nalunaarusiami inassuteqaatit maluginiarneqarput, taakkulu ukununnga tunngasuupput:

- Nr. 8: *"Aqquserngup ingerlaarfissaa piukkunnarnerpaaq ataaseq aalajangissagaanni annikitsortaalu paasiniassagaanni misissuinerit ingerlateqqinneqarneri, ilusilersuinerit piareersaatitullu suliaqarnerit pisariaqartinneqassapput, taamalu sanaartornermi unamminartut suuneri periarfissallu paasilluarlugit. Tamakku isumaqataaffigineqariapata aningaasartuutit missingersuutit nutarterneqartariaqassapput."*
- Nr. 9: *"Missingersuutit nutartikkat unamminartinneqarpata taava ingerlanniakkap nassuiarnera nutartigaq, aningaasaliissatut piukkoortut uppernarsaanerat isertitallu missingersornerat pisariaqartinneqassapput."*
- Nr. 13: *"Paasisagut ataatsimut katikkaanni suliniutip siuariartortinneqarnissaanut aalajangernissaq ilalerpaat, maanna killiffimmi tassaasut misissuinerit amerlanerusut aqqutip ingerlaarfissaanik piukkunnarnerpaap ataatsip aalangiiffiginissaanut annikitsortaasalu paasinissaannut pisariaqartinneqartut."*

Taakku soorunami nalunaarusiami inerniliinerni kisiartaanngillat, kisiannili aningaasaqarneq eqqarsaatigalugu suliassanut pingaaruteqarput, aammalu Naalakkersuisut nalunaarusiaq tunngavigalugu naliliipput, aningaasaqarnikkut sunniutissat inerniliiffigineqarsinnaalissappata suli suliassaartoqartoq. Nalunaarusiami Naalakkersuisut aamma Qeqqata Kommuniata aqquserniornissamut atatillugu aningaasartuutissanik qulaajaanissaat sioqqullugu suliassat ingerlanissaat, kiisalu inuiaqatigiit aningaasaqarnerannut kingunerisassat ersarissumik allaaserineqarput. Taamaattumik suliaq ingerlateqqinniarlugu paasisassat pissarsiarineqarnissaat pisariaqarluinnarpoq.

Kangerlussuup siunissaa pillugu suleqatigiissitap suliassaasa allattorsimaffianni allassimasutut, suleqatigiissitap nalunaarusiaminut aqquserniassaq pillugu sulianut inerniliissutaasoq ilannguttussaavaa. Naalakkersuisuniit suleqatigiissitap inassuteqaatissai inaarutaasut, aammalu suliassap ingerlaqqinnissaa, maannamut nalunaarusiap tunngaviliiffigisaa qilanaarineqarput.

Apeqquut 8. Kangerlussuarmi mittarfiup Kalaallit airport internationalimut ilanngutsinneqarsinnaanera Naalakkersuisut qanoq isumaqarfigaat?

Akissut: Apeqquut 4-mut akissummi allassimasutut, Naalakkersuisut UPA2022-mi Mittarfeqarfiit aktianik piginneqatigiiffingortinneqarnissaat pillugu inatsisissatut siunnersuummik saqqummiussinissartik naatsorsuutigaat.

Siunnersuummi Mittarfeqarfiit, tassungalu Kangerlussuarmi mittarfik ilanngullugu Kalaallit Airports Holding A/S-ip ataani piginneqatigiiffiit akileeqataassutigineqarnissaat siunnerfigineqarpoq, taamaalillunilu mittarfinnik ingerlatsinerit ingerlatseqatigiiffinnut ataatsimoortunut katersuutsinneqassapput, suliat assigiinngitsut ataatsikkut sunniutaat, tamatumalu kingunerisinnaasaanik pitsannguinerit ersarissisinneqassallutik.

Kalaallit Airports Gruppen-imi piginneqatigiiffiit akornanni pigisat nalillit allangortiterneqarnissaat maanna piginnittuusut akornanni sukumiisumik aalajangiiffineqanngillat.

Neriuppunga qulaani allaqqasuni apeqquuteqaatitit akineqartut.

Inussiarnersumik inuulluaqqusillunga


Naaja H. Nathanielsen